

दिनांक 19.01.2025

समय: 18.45 बजे

आकाशवाणी जयपुर—अजमेर

प्रादेशिक समाचार

- प्रधानमंत्री नरेन्द्र मोदी कह्या — भारत अंतरिक्ष प्रौद्योगिकी रा हलका मांय नुवां मानक थापित कर रह्यो है।
- मुख्यमंत्री भजन लाल शर्मा महाकुम्भ मांय राजस्थान मण्डप रो जायजो लियो—वे अहलकारां सू मण्डप मांय आबा वाळां हर राजस्थानी ने इमदाद मुहैया कराबा ने कह्या।
- केन्द्रीय गृह मंत्री अमित शाह एनडीआरएफ री भूमिका ने सराया।
- प्रदेश मांय आज भी केई ठौड़ां माथे घनो कोहरो छाये रह्यो—21 जनवरी सू राज्य मांय नुवां पश्चिमी विक्षोभ रे सक्रिय होबा रा आसार।

000

प्रधानमंत्री नरेन्द्र मोदी देश रा अन्तरिक्ष रा हलका मांय कर्या गया कामां री सराहवणा करी। वे भारतीय वैज्ञानिकां री स्पेस डॉकिंग प्रक्रिया ने ऐतिहासिक बताया। प्रधानमंत्री कह्या के दूरदर्शी वैज्ञानिकां री बदौलत भारत अंतरिक्ष प्रौद्योगिकी रा हलका मांय नुवां मानदंड थापित कर रह्यो है, जिण सू भावी चुनौतियां रो सामनो करबा मांय इमदाद मिलेला। श्री मोदी आज आकाशवाणी सू मन की बात कार्यक्रम मांय आप रा विचार साझा कर रह्या हा। वे कह्या के भारत आज आधुनिक स्पेस टेक्नोलॉजी मांय सब ऊं आगे है।

प्रधानमंत्री स्टार्टअप्स रो जिक करता थकां कह्या के आज देश रा छोटे शहर भी स्टार्टअप रो केन्द्र बण रह्या है। श्री मोदी कह्या के या गर्व री बात है के ई मांय सू आधा सू बत्ता स्टार्टअप बेटियां कानी ऊं कर्या जा रह्या है।

ई बरस रा पैला मन की बात कार्यक्रम ने सम्बोधित करता थकां प्रधानमंत्री सगळा ने सामुहिक इच्छाशक्ति रे सागे देश रा विकास मांय भागीदारी निभाबा ने कह्या। वे कह्या के लारला दशक मांय देश रो लोकतंत्र मजबूत व्ह्यो है। ई रे सागे ई प्रधानमंत्री कह्या के कुम्भ री विविधता एकता रो उत्सव है, अठे पूरी दुनिया सू लोग आवे है। ई मांय मोदयारा री भागीदारी बत्ता रूप ऊं निजर आवे है। श्री मोदी देशवासियां ने गणतंत्र दिवस री शुभकामनावां भी दी। वे कह्या के इण बरस भारतीय गणतंत्र री 75वीं वर्षगांठ है इण खातर ई गणतंत्र दिवस रो खास महत्व है।

मुख्यमंत्री भजनलाल शर्मा आज प्रयागराज मांय राजस्थान मण्डप मांय मन की बात कार्यक्रम ने सुण्या। प्रदेशभर मांय मन की बात कार्यक्रम कई ठौड़ां माथे सामुहिक रूप ऊं सुण्यो ग्यो। केन्द्रीय कृषि राज्यमंत्री भागीरथ चौधरी ई ने कार्यकर्तावां रे सागे अजमेर मांय सुण्या। वठिने भाजपा कार्यालय मांय पार्टी पदाधिकारी अर कार्यकर्ता यो कार्यक्रम सुण्या।

000

महाकुंभ सूं जुड़ी खबरां –

प्रयागराज मांय चाल रह्या महाकुंभ रे दौरान लोग आकाशवाणी सूं प्रसारित प्रधानमंत्री रा मन की बात कार्यक्रम ने सुण्या। ओ कार्यक्रम लाउड स्पीकर सूं प्रसारित कर्यो गयो।

मुख्यमंत्री भजन लाल शर्मा आज प्रयागराज मांय चाल रह्या महाकुम्भ मांय त्रिवेणी संगम माथे पावन डुबकी लगायी। श्री शर्मा प्रदेशवासियां री री सुख-समृद्धि अर मंगलमय जीवन री कामना करी। मुख्यमंत्री काल प्रयागराज पूग्या। वठे राजस्थान मण्डप रो जायजो लियो अर सिरधालुआं ने मुहैया करायी जा रही सुविधावां ने देख्या। वे अधिकारियां सूं राजस्थान मण्डप मांय आबा वाळां हर प्रदेशवासी ने इमदाद मुहैया करावा ने कह्या।

महाकुम्भ मेळा हलका मांय आज आग लाग गयी। इण ने बेगी ही काबू कर लियो गयो। आग सूं किणी रे हताहत होबा री खबर नी है। प्रधानमंत्री उत्तरप्रदेश रा मुख्यमंत्री योगी आदित्यनाथ सूं बात कर घटना जाणकारी ली।

000

अखिल भारतीय पीठासीन अधिकारियां रो सम्मेलन काल सूं पटना मांय सरू व्हे रह्यो है। लोकसभा अध्यक्ष ओम बिरला ई कार्यक्रम रो उद्घाटन करेला। सम्मेलन मांय राज्यां अर केंद्र शासित प्रदेशां रा विधानमंडलां रा पीठासीन अधिकारी अर दूजा जान्या मान्या लोग मौजूद रहवेला। ई दो दिन रा सम्मेलन रो विषय **‘संविधान की 75वीं वर्षगांठ: संवैधानिक मूल्यों को मजबूत बनाने में संसद और राज्य विधान निकायों का योगदान’** है। सम्मेलन रे दौरान लोकसभा अध्यक्ष ‘संसद री कार्यप्रणाली अर प्रक्रिया’ रा 8वां संस्करण रो विमोचन करेला।

000

केन्द्रीय मंत्री भूपेन्द्र यादव आज कोटपुतली-बहरोड़ रा दौरा माथे रह्या। ई दौरान वे केई कार्यक्रमां मांय भाग लीना। इण मौके वे बहरोड़ रा खोहर गांव मांय ई-लाइब्रेरी रो उद्घाटन कर्या। श्री यादव कह्या के पढनियां खातर पुस्तकालय भवन तैयार कर्यो ग्यो है ई सूं गांवांई हलका रा पढनियां ने घणो फायदो मिलेला।

000

जयपुर ज़िला मांय लाडेसर अभियान सरू कर्यो ग्यो है। इण रे तैत ज़िला रा कुपोषित अर अति कुपोषित टबरां री पिछाण कर वां ने पोषण किट दिया जावेला। पेश है एक रपट—

आज **राष्ट्रीय आपदा प्रतिक्रिया बल-एनडीआरएफ** रो थापना दिवस है। आपात रा हालात मांय देश रा बचाव प्रतिक्रिया दल रा रूप मांय इण री सरूआत करी गयी ही। ई मौके प्रधानमंत्री नरेन्द्र मोदी आप रा संदेश मांय एनडीआरएफ रा साहस, समर्पण अर आपात स्थितियां मांय वां री अटूट प्रतिबद्धता री सरावणा कर्या। श्री मोदी कह्या के **एनडीआरएफ** आपदा प्रबंधन मांय वैश्विक मानक थापित कर्या है।

केंद्रीय गृह मंत्री अमित शाह भी एनडीआरएफ री आपदा री टेम री भूमिका री तारीफ करी। विजयवाड़ा मांय एक जळसा मांय वे कह्या के जद भी कोई आपदा आवे है तो एनडीआरएफ मदद खातर हमेशा तैयार रहवे है।

सवाईमाधोपुर शहर रो आज 262 वो थापना दिवस है। ई मौके हैरिटेज वॉक अर पारम्परिक खेलकूद समेत केई कार्यक्रमों री सुरुआत व्ही। म्हाका संवाददाता रे मुजब स्थापना दिवस समारोह री सुरुआत त्रिनैत्र गणेश मंदिर मांय महाआरती रे सागे व्ही।

महान योद्धा महाराणा प्रताप री आज पुण्यतिथि है। ई मौके प्रदेश मांय न्यारी-न्यारी ठौड़ां माथे सिरधाजली कार्यक्रम व्ह्या।

000

सर्दियां रा मौसम रे सागे ई प्रदेश रा बाजारां मांय तिल, गुड़ अर मूंगफली री दुकानां सज जावे है। कड़ाका री ठण्ड मांय गजक री मांग भी बढ़ जावे है पेश है एक रपट—

प्रदेश मांय आज सीकर, चूरू, करौली, भीलवाड़ा, भरतपुर, श्रीगंगानगर, हनुमानगढ़ अर जयपुर समेत केई जिला मांय घनो कोहरो छाये रह्यो। मौसम मेहकमां रे मुजब आज कम ऊं कम तापमान मांय थोड़ी बढ़ोतरी दर्ज करी गई है। बत्ती ठौड़ां माथे कम ऊं कम तापमान 7 सू 12 डिग्री सेल्सियस रे बीच दर्ज क्यो गयो। वठिने सब ऊं कम सिरौही मांय 4 दशमलव 9 डिग्री सेल्सियस कमती रो तापमान रह्यो।

000